

No. Soalan: 17
PR-1353-L03242

PEMBERITAHUAN PERTANYAAN BAGI JAWAB LISAN
DEWAN RAKYAT MALAYSIA

PERTANYAAN : **JAWAB LISAN**

DARIPADA : **TAN SRI DATUK SERI PANGLIMA**
JOSEPH PAIRIN KITINGAN
[KENINGAU]

TARIKH : **22 NOVEMBER 2017**

SOALAN : **Tan Sri Datuk Seri Panglima Joseph Pairin Kitingan [Keningau]** minta **MENTERI LUAR NEGERI** menyatakan bagaimanakah jalinan kerjasama dan perhubungan diplomatik di antara Malaysia dan Negara Filipina dan adakah perbincangan menggugurkan 'Sabah Claim' dari masa ke masa.

23

JAWAPAN

Tuan Yang di-Pertua,

Saya mengucapkan terima kasih kepada Yang Berhormat Keningau atas pertanyaan yang dikemukakan.

2. Untuk makluman Dewan yang mulia ini, jalinan hubungan dua hala di antara Malaysia dan Filipina adalah baik dan berada di tahap yang tinggi. Kedua-dua negara terus mengikrarkan komitmen untuk mengeratkan lagi jalinan kerjasama yang sedia ada serta menjangkau ke arah mencari kerjasama-kerjasama baru di dalam usaha mempertingkatkan lagi keakraban ini.

3. Kita boleh menterjemahkan keakraban hubungan dua hala Malaysia-Filipina melalui kekerapan lawatan di antara pemimpin pada peringkat tertinggi. Pada tahun 2014, Presiden Benigno S. Aquino III telah mengadakan Lawatan Negara ke Malaysia. YAB Perdana Menteri juga telah mengadakan Lawatan Kerja ke Filipina pada tahun yang sama yang mana pada Lawatan tersebut beliau telah menyaksikan Majlis Menandatangani *Perjanjian Komprehensif mengenai Bangsamoro (Comprehensive Agreement on the Bangsamoro - CAB)*. Hubungan Malaysia dan Filipina diperkukuhkan lagi oleh Lawatan Rasmi Presiden Rodrigo Duterte ke Malaysia pada 10 November 2016 lalu.

4. Dari sudut impak ekonomi pula, Filipina adalah merupakan rakan perdagangan Malaysia ke-5 terbesar di ASEAN dan ke-16 terbesar di dunia. Sejak beberapa tahun yang lalu, jumlah dagangan Malaysia dengan Filipina telah terus meningkat. Bagi suku pertama tahun ini,

jumlah dagangan dengan Filipina berjumlah USD1.91 bilion (RM8.46 bilion) iaitu peningkatan sebanyak 18.8 peratus berbanding USD1.58 bilion (RM6.52 bilion) pada tempoh yang sama pada tahun 2016.

Tuan Yang di-Pertua,

5. Umum juga mengetahui bahawa sejak tahun 2001, Malaysia telah diberi penghormatan dan kepercayaan oleh Kerajaan Filipina untuk memainkan peranan sebagai pemudahcara dalam proses rundingan damai di antara Kerajaan Filipina dan Barisan Pembebasan Islam Moro (*Moro Islamic Liberation Front - MILF*). Ingin saya sebutkan di sini bahawa hasil pembabitan Malaysia, kedua-dua pihak telah berjaya menandatangani *Perjanjian Komprehensif mengenai Bangsamoro* di Manila pada 27 Mac 2014. Malaysia akan terus komited untuk memainkan peranan sebagai pemudahcara untuk membantu usaha melaksanakan *Perjanjian Komprehensif mengenai Bangsamoro* tersebut.

6. Di samping itu, komitmen Malaysia berhubung proses damai di Selatan Filipina juga dizahirkan melalui penglibatan dalam Tim Pemantauan Antarabangsa – Mindanao (IMT-M). Kehadiran IMT-M ini telah berjaya menyumbang kepada peningkatan keamanan di Selatan Filipina. Hakikat ini diakui sendiri oleh Presiden Duterte semasa pertemuan beliau dengan YAB Perdana Menteri pada 10 November 2016. Berikutan lawatan ini, Pasukan Pemantau IMT-M12 dari Malaysia telah diberikan mandat untuk memulakan tugas mereka di Mindanao pada 14 Mac 2017 bagi menggantikan pasukan IMT-M11 yang telah tamat tempoh penugasan mereka pada tahun 2016.

Tuan Yang di-Pertua,

7. Malaysia dan Filipina juga mengambil pendekatan inovatif untuk mempertingkatkan lagi tahap keselamatan di antara kita. Yang terbaru, Malaysia dan Filipina bekerjasama bersama-sama dengan Indonesia di dalam isu keselamatan. *Framework on Trilateral Cooperative Arrangement Indonesia-Malaysia-the Philippines on Immediate Measures to Address Security Issues in the Maritime Areas of Common Concern* yang telah ditandatangani pada 14 Julai 2016 telah berjaya menangani isu keselamatan perairan ketiga-tiga negara. Berikutan keberkesanan kerjasama tiga hala ini, pada 22 Jun 2017, ketiga-tiga negara telah turut bersetuju untuk bekerjasama untuk menangani isu-isu berkaitan dengan keganasan dan ekstrimisme di rantau ini.

8. Bagi menjawab soalan berkenaan "Sabah Claim", saya ingin menegaskan bahawa Kerajaan Malaysia telah berulang kali menegaskan pendiriannya bahawa Malaysia tidak mengiktiraf dan tidak akan melayan sebarang tuntutan oleh mana-mana pihak ke atas Sabah. Sabah telah diiktiraf oleh Pertubuhan Bangsa-Bangsa Bersatu (PBB) dan masyarakat antarabangsa sebagai sebahagian dari Malaysia sejak 16 September 1963.

Tuan Yang di-Pertua,

9. Malah, YB Menteri Luar Negeri, juga telah beberapa kali mengeluarkan kenyataan bagi menegaskan pendirian Malaysia yang tidak mengiktiraf tuntutan Filipina ke atas Sabah.

10. Pendirian yang sama juga disampaikan semasa pertemuan YAB Perdana Menteri dengan Presiden Republik Filipina TYT Rodrigo Duterte pada 10 November 2016 yang mana isu ini telah dibangkitkan dan Malaysia sekali lagi telah menegaskan pendiriannya bahawa Sabah adalah sebahagian daripada Malaysia.

Sekian, terima kasih.